

# YB Bukit Gantang isytihar sokong PM

**Kuala Lumpur:** Seorang lagi Ahli Parlimen pembangkang, Datuk Syed Abu Hussin Hafiz Syed Abdul Fasal (PN-Bukit Gantang) mengumumkan sokongan kepada Perdana Menteri, Datuk Seri Anwar Ibrahim di Dewan Rakyat, semalam.


Beliau adalah Ahli Parlimen pembangkang kelima berkata demikian ketika mengajukan soalan tambahan pada sesi Waktu Pertanyaan Perdana Menteri (PMQT).

“Saya sendiri bersedia untuk memberi dan membantu kerajaan mewujudkan masyarakat MADANI menangani kenaikan harga barang dan kos sara hidup dengan mengambil ibrah Nabi Yusuf AS.

“Dengan ini, Bukit Gantang

mengisytiharkan menyokong Yang Amat Berhormat Tambun sebagai Perdana Menteri ke-10 dan gagasan Kerajaan MADANI,” katanya.

Sebelum ini, sokongan bermula dengan Ahli Parlimen Kuala Kangsar, Datuk Iskandar Dzulkarnain Abdul Khalid pada 12 Oktober lalu, diikuti Ahli Parlimen Labuan, Datuk Suhaili Abdul Rahman (30 Oktober), Ahli Parlimen Gua Musang, Mohd Azizi Abu Naim (7 November) dan Ahli Parlimen Jeli, Zahari Kechik (8 November) menyatakan pendirian menyokong Anwar.



*Syed Abu Hussin Hafiz*

Speaker Dewan Rakyat, Tan Sri Johari Abdul, dilaporkan berkata tindakan empat Ahli Parlimen itu tidak berkaitan dengan Akta Perlembagaan (Pindaan) (No 3) 2022 (Akta A1663) yang melarang Ahli Dewan Rakyat untuk bertukar parti yang boleh menyebabkan mereka hilang kerusi di Parlimen.

Syed Abu Hussin sebelum itu turut mengajak bekas Perdana Menteri, Datuk Seri Ismail Sabri Yaakob (BN-Bera) dan Tan Sri Muhyiddin Yassin (PN-Pagoh) untuk membantu pembinaan ma-

syarakat MADANI.

“Dalam keadaan politik negara yang tidak stabil ini, bagaimana kerajaan nak menguruskan ekonomi, harga barang terus naik, kos sara hidup makin tinggi.

“Oleh itu demi negara yang tercinta saya meminta Tambun, Pagoh dan Bera buang yang keruh dan ambil yang jernih, marilah Pagoh dan Bera sebagai bekas Perdana Menteri bersama Tambun membina masyarakat MADANI.

“Kepada ahli Parlimen pembangkang pula, marilah kita berunding sebaik-baiknya dengan pihak kerajaan seperti persefahaman ketika Yang Berhormat Bera menjadi Perdana Menteri,” katanya.